



2018-imut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Nunanilu Avannarlerni suleqatigiinnermut Naalakkersuisoq)

(Siullermeerneqarnera)

Landskarsip suussutsinut immikkoortitaluni naatsorsuisimanerata takutippaa 2018-mi ingerlatsinermit sinneqartooruteqartoqarsimasoq 90 mio. koruunik, taakkulu naatsorsuutigisamit 171 mio. koruunik ikinnerupput.

Ilaatigut tamatumunnga tunngavilersuutigineqarpoq Namminersorlutik Oqartussat isertitaat 280 mio. koruunik amerlanerusimasut, taakkulu pingaartumik immikkoortunit pingasuninngaanneerput, tassaallutik raajanut aalisakkanullu akitsuutinit 154 mio. koruunit, bloktilskuddit qaffaataat 110 mio. koruunit kiisalu nuna tamakkerlugu akileraarutip qaffaataa, aalisarnerup ingerlalluarsimanera pissutaalluni.

Tamatuma takutippaa Namminersorlutik Oqartussat iseritai aalisarnermeersut, aningaasaqarnitsinnut qanoq pingaaruteqarluinnartigisut.

90 mio. koruunit naatsorsuutigineqarsimagaluartutut 171 mio. koruuniunnginnerannut pissutaatinneqarpoq ilaatigut ingerlatsinermit aningaasartuutit qaffassimanerannit tamannali naliginnaasumik ineriartornerusimasutut taaneqarluni aamma pissutaatinneqarpoq oqartussaaffiit ilaannik kommuninut nuussisoqarsimanera taamaattumillu kommuninut tapiissutit qaffanneqarsimasut.

Isumaqarpunga Namminersorlutik Oqartussat tamanna naatsorsuutigereersimasariaqaraluaat. Paasisinnaakuttoorpara siulittuutigineqarsinnaangimmat aalisarneq qanoq ingerlajumaarnersoq aamma aalisarnerup landskarsip aningaasaqarneranut sunniutai imaaliallannerinnakkut nikissinnaapput taamaakkaluartorli ingerlatsinermit aningaasartuutit 429 mio. koruunik qaffannissaat pitsaanerusumik tagginneqarsimasinnaagaluarpoq.

Aalisarneq ingerlanerlussimasuuppat aningaasaqarnitsinnut tamanna qanoq sunniuteqarsimassagaluarnersoq eqqarsaatigiuminaatsippara, ullumikkummi takusinnaasatsitut aningaasaqarnitsinnut nalaatsornerinnakkut iluatsitsinissaq tunngaviginiarneqarmat.

Ukiut siuliini oqareernitsitut angusanut kusanartunut pissutaangilaq Inatsisartut angisuumik iluarsartuussisimanerat imaluunniit pisortat allaffissornerata millisimanera.

Pisut nalaatsornerinnarmik pisut pissutaapput. Taamaattumik pisarnitsitut iliunnassanngilagut, pitsanngorsaaniissamut pikkorinnerusariaqarpugut suliarlu tamanna ippassarli aallartinneqareersimasussaagaluarpoq.



Taamatut naatsumik oqaaseqarluta siunnersuut sukumiisumik suliassanngorlugu Kukkunersiuinermut
Ataatsimiititaliamut innersuupparput sulilluarnissaannillu kissaallugit.